

Tatou faiga faavae tau soifua maloloina ma auaunaga i le tino ma le mafaufau e lē o malosī atoatoa

Tausimea

O le uiga o le "Tausimea" e faamautinoaina ai o loo lelei le galulue faatasi o vaega uma o le faiga faavae tau soifua maloloina ma auaunaga i le tino ma le mafaufau e lē o malosī atoatoa, e faataunuu tausiga lelei i tagatanuu uma o Niu Sila i se auala e gafataulimaina ai. O se tasi lea o auala autu e mafai ai ona avea ma matafaioi a le faiga faavae galuega o loo taumafai e ausia.

O ā mea ua suia nei?

O le Matagaluega o Soifua Maloloina o loo avea nei ma taitai autu mo le faiga faavae, ma e tumau ai pea. Peitai, o loo matou faia nisi o suiga e faamalosiā ai le matafaioi lenē ma faamautinoa ai o loo faataunuu e le faiga faavae atoa galuega mo a tatou tagata.

I le lumanai, o le faalapotopotoga fou – Health New Zealand – o le a fitoitonu ma le faataunuuina o tausiga ma le puleaina o auaunaga, e aofia ai galuega o loo faatautaia i le taimi nei e District Health Boards (DHBs) ma le Matagaluega o Soifua Maloloina. O le a vaavaaia e le Health NZ le faatinoga o auaunaga nei, uunaia le faaleleia ma le atinaega o faiga fou, ma faatino auala e talafeagai ona suia mo auaunaga. O le a galulue faapaaga ma le Māori Health Authority e faamautinoa o loo faatino auaunaga mo tagata Māori.

O le a toe taulai le matafaioi a le Matagaluega o Soifua Maloloina i fuafuaga faataatia, taiala, tulafono ma le mataituina o taunuuga ua ausia atoa e le faiga faavae. O lea suiga o le a faataga ai ona fautua e le Matagaluega le Minisita o Soifua Maloloina na te tuliloaina se tali mai faalapotopotoga e tusa ai ma a latou tiute tauave, ma lagolagoina galuega faatino e tusa ma faamoemoega e lei ausia.

O le a galulue faapaaga foi le Māori Health Authority ma le Matagaluega i lona tulaga o le tausimea mo le soifua maloloina o tagata Māori – faamautinoaina ai o loo faatino e lo tatou faiga faavae galuega mo tagata Māori, ma tuliloa le faatinoga o galuega e tusa ai ma sini autu mo le soifua maloloina ma faiga talafeagai ma sa'o mo tagata Māori.

Aisea?

O loo faataunuu auaunaga tau soifua maloloina i le taimi nei e DHBS e 20, ma ua aliaē ai ma tulaga faigata e lē o moomia ma le faatinoga e auaunaga eseese o galuega lava e tasi. E mafai ona avea ma tulaga faigata mo le Matagaluega o Soifua Maloloina ona mataitu ma pulea le faatinoga o galuega i le faiga faavae atoa tau soifua maloloina. Ua atili foi ona faigata ona avea ai le Matagaluega o Soifua Maloloina ma tausimea o le faiga faavae tau soifua maloloina auā e feagai sa'o ma le faatonuina ma le puleaina o le tele o auaunaga, ma ua atili ai ona lē maopoopo le faiga faavae.

O le tuufaatasia o galuega e faatinoa i lalo o le faamalumaluga a le Health NZ, o le a sili ai ona faigofie le tausia o le faiga faavae atoa. O lea suiga o le a mafai ai e le Matagaluega o Soifua Maloloina ona mataitu na o le tasi le faalapotopotoga nai lo le 20 o faalapotopotoga, ma lagolagoina ai le Matagaluega o Soifua Maloloina e atiae ma faataunuu taiala aoao ma fuafuaga faataatia tau soifua maloloina.

E lē gata i lea, o le faamatuina atu o le matafaioi e avea ai le Māori Health Authority ma tausimea e tali atu i faaletonu ua loa tausaga e lei mafai e le faiga faavae tau soifua maloloina ona ausia tausiga talafeagai ma sa'o mo tagata Māori, ma faamautinoa ai le faatumauina o le taulaiga i le soifua maloloina o tagata Māori.

O le a faapei foliga o lea faiga faavae fou i le lumanai?

O le a mataitu ma lipotia e le Matagaluega o Soifua Maloloina taunuuga ua ausia e le faiga faavae atoa, faatasi ai ma le Māori Health Authority. O le a atiae, faatonu ma faataunuu e le Health NZ ma le Māori Health Authority auaunaga tau soifua maloloina e ausia manaoga o tagatanuu Niu Sila, ma o le a tuliloaina se tali e tusa ma lo latou faatinoga o galuega, ma o le a fausia faiga fou ma faaleleia auaunaga nei.

O le a fesoasoani le Health NZ, faatasi ai ma le Matagaluega o Soifua Maloloina, ma le Māori Health Authority ma isi auaunaga tau soifua maloloina e pei o le Health Quality and Safety Commission, i faalapotopotoga o faia tausiga ia faaaauu pea ona latou faamalositia auaunaga ma tali atu i lamatiaga e ono tulai mai poo faaletonu.

A faaletonu le faatinoga o galuega, e pei o taunuuga tau le tausiga e lei ausia, o le a mafai e le Health NZ ona vave ona faailoa faafitauli e auala atu i ofisa i totonu o itumalo ma afioaga, ma saunia fesoasoani ma fautuaga e mafai ona toe faatulaga lelei ai le tausiga i le alafua e tatau ona iai. Afai e aveavea'i ai pea faafitauli, o le a taumafai le Matagaluega o Soifua Maloloina e faailoa faafitauli nei e auala atu i galuega faatino e mataitu ma lagolagoina ai faiga e tali atu ai.

O le ā le isi laasaga?

O le a faavae se faalapotopotoga mo se taimi lē tumau i le faaiuga o le 2021 e lagolago ai le faavaeina o le Health NZ ma le Māori Health Authority. Faatasi ai ma le Matagaluega o Soifua Maloloina, o faalapotopotoga nei o le a latou atiaeina se auivi i auala e mafai ai ona galulue soosoo tauau e faataunuu tausiga lelei mo tagatanuu Niu Sila, ma auala o le a mafai ai e le Health NZ ona tali atu i Minisita ma o tatou afioaga mo auaunaga tau soifua maloloina.

E te fia iloa atili?

Mo nisi faamatalaga e uiga i galuega ma tulaga ua ausia mo le toefuataia o galuega tau soifua maloloina, tagai i le upegatafailagi a le DPMC i le itulau o loo ta'ua ai galuega a le Transition Unit:

www.dPMC.govt.nz/our-business-units/transition-unit